

Historia di

CARNAVAL

Aruba ta den su celebracion di 57 aña di Carnaval, pero esaki ta desde cu SAC a wordo funda. Pero prome cu esaki tabata tin gruponan na Aruba cu ya na decada 40 a cuminsa celebra e fiesta aki.

Pa cuminsa tabata tin un grupo di personanan, mayoria di nan procedente di e isla Ingles di Dominica, cu tabata organisa un sorto di parada na pia mes rond den bario di Wilhelminastraat, unda un di nan tabata biba. Mucha y hende grandi tabata participa y nan tabata balia pareu cu bo ta mira henter e grupo move hunto. Mayoria di nan tabata bisti cu mascarada traha di waya cu nan mes a traha. Sombrenan grandi y tur sorto di paña tabata nan disfras. Tin aña cu tur tabata bin bisti na saco di 'cus' (saco traha di tela grof) y di cabuya habri. E organisadora di tur esaki tabata e señora Brinette

(q.e.p.d.) - cariñosament e yama Mabin. E parada no tabata tin ora fiho pa sali. Nan tabata warda tur participante pa yega na cas di Mabin pa asina nan sali. Esaki semper tabata den oranan di



*E grupo di Mabin
(foto cortesía sra. Bardouille)*

mainta; saliendo for di e cas, situa den Wilhelminastraat, unda tin poco kwihi y un parkeerplaats net p'ariba di Toys "4" Us.

E ruta di e parada aki tabata masha cortico y probablemente ni permiso tabata tin, ni tabata mester e tempo ey. Ora e parada bolbe na cas di Mabin ta sigui fiesta te anochi cu baile.

Otro grupo cu a cuminsa celebra e fiesta di Carnaval rond di añanan '40 tabata Aruba Tivoli Club, e tempo aya e tabata bao otro number, esta Aruba Tennis Club. Ya na 1944 nan a eligi nan prome reina di Carnaval. Den principio e miembronan tabata celebra den club mes, y antes e fiesta aki tabata tin e number di "Mamaracho". Tur miembro tabata bin disfrasa di locura. Riba un otro anochi tabata tin disfrasnan luhoso. Durante ambos anochi tabata tin

baile y premionan pa e miho disfras.


Tivoli tabata elegi tres reina tur aña, esta e reina di Carnaval, e Miss Tivoli, y e reina di Simpatia. Un par di aña despues e club a dicidi di subi cayanan di Oranjestad, cu musica di disco y cu loudspeakernan instala riba dak di auto of di truck. E temponan ey reinanan tabata sinta riba autonan convertible (sin dak) y carosanan tabata trucknan dorna cu bandera, tela y flor traha di crepe.

Nan ruta tambe tabata cortico: pasando den Caya Betico Croes (e tempo ey Nassaustraat), pasa banda di cura di hospital (bieu) pa asina e enfermonan tambe por a mira nan parada y via Emanstraat nan ta regresa nan club pa sigui fiesta.

Mas o menos na aña 1951 Señores Rufo Wever (q.e.p.d.) y Padu Lampe a compone e prome piesa di Carnaval: "Carnaval, carnaval, esta dushi ta carnaval".

E grabacion di e disco a tuma lugar na Aruba Recording & Company di Sr. Rufo Wever cu tabata situa na Wilhelminastraat. E piesa aki ta canta pa Edwin Zichem (q.e.p.d.) y e acompañamento musical tabata di un grupo di amigo cu tambe a fungi como coro.

E pregunta ta keda ainda: Ken a cuminsa fiesta di Carnaval na Aruba? Esnan na San Nicolas ta bisa cu ta nan, na Playa na bisa cu ta Tivoli. Informacion concreto no tin, pero si por bisa cu, mirando historia, indudablemente Carnaval a nace den Wilhelminastraat, tanto cerca señora Mabin, como pa miembronan di Aruba Tivoli Club, como tambe e prome piesa di Carnaval.




*Bista riba parti di e parada di Aruba Tivoli Club
(foto cortesía sra. Arends)*



Chabalito

Number 5 - Año XIII



3.00
(incl. B.B.O.)